

A photograph of a river with autumn foliage reflected in the water. The water is dark, and the reflections are vibrant with yellow, orange, and green. The background is a dense forest of trees with autumn leaves.

Towerlantern Fotografie
fotografienuus
oktober 2019

"Potchefstroom se mooi rivier"
Lensopening f4,5; Sluiterspoed 1/6 sekonde; Fokale lengte 75 mm

Baie van ons lesers is afkomstig van Potchefstroom of naburige dorpe, en ander bly weer verder weg – tot selfs by die see. Waar jy ook al bly, besef jōu stad, dorp of plaas het ook sy mooi karakter. Elke plek, tot die kleinste gehuggie, het sy fotomoontlikhede. Sien dit altyd raak!

So het Potchefstroom sy Mooirivier, wat soms mooi is – vandaar ons titel – maar ongelukkig soms ook minder mooi. Gelukkig is daar woonbuurte in Potchefstroom, aangrensend aan die rivier, waar die inwoners hulle daarop toelê om hul deel van die rivier mooi en skoon te hou.

Die voorbladfoto vertel ook iets anders, en dit is: Probeer om iets onwerkliks met jou foto's te skep, soos hierdie idilliese toneel. "Onwerklik" bedoel hier die foto hoef nie soos die werklikheid te lyk nie. Dit moet veel eerder die gevoel of indruk van dit wat jy sien, uitdruk. Dit is minstens een vorm van kuns. Lees verder ook meer hieroor in hierdie uitgawe.

Johan

Redakteur: Johan de Klerk

Bladuitleg: Fransa Vorster van [Colourcode Designs](#)

Wil jy graag 'n bydræ lewer tot Towerlantern se nuusbrief?

Kontak ons gerus vir meer inligting hieroor!

Towerlantern behou die reg voor om sekere artikels / foto's nie te plaas nie. Menings uitgespreek in artikels is dié van die skrywers, en nie van Towerlantern self nie.

Ons ontvang ook advertensies, doen gerus navraag.

voorbladfoto

Enige plek het sy opwindende fotogeleenthede, die fotograaf moet daarna soek. In Potchefstroom en omgewing het ons gelukkig 'n paar sulke plekke: die Mooirivier, die Botaniese tuin van die universiteit, die akkerlaan en, in die distrik, 'n gedeelte van die Vredefort-koepel. Kyk gerus by <https://af.wikipedia.org/wiki/Vredefort-koepel> vir meer inligting oor laasgenoemde. Doen ook die moeite om op internet na meer foto's hiervan te kyk deur die soekterm *Vredefort dome* te gebruik.

Maar terug by die Mooirivier en ons voorbladfoto. Vir diegene wat dit nie weet nie, hierdie rivier (vir sommige net 'n stroom) vloei van noord na suid deur die dorp. Deur die jaar is daar verskillende tipes fotomoontlikhede; die voorbladfoto is een so 'n moontlikheid – idillies en onwerklik. 'n Ondernemende fotograaf sou selfs so ver kon gaan om deur die jaar die verskillende luime van die rivier vas te vang.

As jy in of naby Potchefstroom woon, besoek gereeld dié rivier. As jy verder weg bly en tog soms hier kom, doen navraag oor die beste fotoplekke.

Wat die fototegniek van die voorbladfoto betref, lees verderaan hoe om dit te doen. En moet tydens nawerking nie huiwer om maar bietjie kleur ook by te voeg nie, veral in die droër maande.

SKEP *onwerklike* TONELE


Hoe skep jy 'n onwerklike toneel met jou kamera as jy net die werklikheid om jou sien? As jy jou kamera ken is dit dood maklik!

Hoekom wil 'n kunstenaar 'n onwerklike toneel skep? Het jy al daaraan gedink dat as jy dit met jou kamera doen, jy skeppend is en iets gaan produseer wat niemand anders jou ooit sal kan nadoen nie. Trouens, jy sal die presiese toneel self ook nie weer kan nadoen nie.

Dit moet dadelik gesê word dat daar baie maniere is om onwerklike foto's te skep. Wat werkwyse betref, kan twee groot tegniektipes onderskei word, naamlik met

- ✓ die kamera en
- ✓ 'n fotoverwerkingsprogram.

Ons gesels verder net oor eersgenoemde met die wete daarby dat ligte fotoverwerking, soos onder andere snywerk (Engels: *cropping*) en kleurversadiging, wel in orde is.




Hier is enkele tegniekvoorstelle:

- ✓ Gebruik 'n groot lensopening.
- ✓ Gebruik 'n lang sluiterspoed.
- ✓ Fotografeer waterweerkaatsings.
- ✓ Beweeg die kamera effens.
- ✓ Ontfokusseer die kamera bietjie.

Kyk verderaan na enkele voorbeelde. Bestudeer ook die riglyne vir die skep van onwerklike beelde. Stuur beslis van jou pogings vir evaluering en/of plasing. Ons help graag.


Voorbeelde van
onwerklike tonele

Vlakvelddiepte



Effense ontfokussering

Kamerabeweging



En as jy na nog idees soek (ook met swaar verwerking van foto's), gaan na die volgende adres: <https://bit.ly/2mNPkKt>

RIGLYNE

om onwerklike tonele te skep

Ons neem aan jy is by 'n plaasdam, spruit of rivier met 'n mooi boom- of bosweerkaatsing, of iets dergeliks. Ons neem aan daar is effense kabbelings op

die water (of skep dit self). Volg dan die volgende prosedure om 'n onwerklike weerkaatsingstoneel te skep:



Driepoot: Gebruik 'n driepoot.

Komposisie: Laat 90% van die komposisie weerkaatsing wees en 10% werklikheid (byvoorbeeld oewer met gras). Die toneel se komposisie moet so wees dat die foto na omkering 'n goeie komposisie sal hê.

Lensstelsel: Gebruik enige lens, afhangend van die toneel.

ISO: Begin by 'n lae waarde en pas aan.

Fotoformaat: Kies 'n geskikte formaat. My eerste keuse is landskapformaat.

Witbalans: Kies 'n geskikte witbalans.

Lensopening: Eksperimenteer met die lensopening. My keuse is eerder 'n groter as kleiner lensopening.

Fokusering: Fokuseer op dié punt wat die trefpunt moet wees.

Sluiterspoed: Gebruik die kamera se linaal vir goeie beligting.

Fotosessie: Neem heelwat foto's en eksperimenteer. Vir die finale produk moet die foto onderstebo gedraai of onderstebo roter word.


digitale fotografie

Heelwat van ons lesers kom uit die vorige eeu met sy filmfotografie; ander wonder miskien net oor hoe fotografeer vroeër foto's geneem gekry het en skud dan hul koppe oor so 'n domheid.

Digitale fotografie is relatief nuut, maar ook nie heeltemal so nuut nie. Die eerste verbyvlugfoto's van Mars, byvoorbeeld, is uit die Mariner 4-ruimtetuig geneem op 15 Julie 1965. Die foto's wat met die spesiale kamera in hierdie tuig geneem is, is aan boord verwerk deur 'n sogenoemde versyferaar (Engels: *digitizer*) en is as digitale beeld op band gestoor. Later is dié inligting met 'n stadige oordrag terug aarde toe gestuur. Die foto's hierby gee 'n idee van hoe dit gelyk het en die getallepatroon bo- en onderaan hierdie bladsy wys hoe 'n versyferde binêre getalleteks tipies sou lyk. Kyk verder ook by <http://s.telegraph.co.uk/graphics/projects/mars-first-photo-anniversary/index.html> hoe verdere foto's gelyk het.

Die eerste digitale kameras soos ons dit ken is egter teen die laat 1990's bemark. Die oorgang van filmkameras na digitale kameras was aanvanklik stadig (soos met enige nuwe saak). Met die koms van selfone met ingeboude kameras (ongeveer 2007) het digitale fotografie gekom om te bly. Sedert 2010 het die bekende digitale kameras ook mededinging begin kry van die sogenoemde spieëllose kameras.

Lees by Wikipedia (soekterm *digital photography*) die uitgebreide oorsig oor die ontstaan en ontwikkeling van digitale fotografie. Besef ook dat in die jare vorentoe nog baie veranderinge gaan kom – nie net wat fotografie betref nie, maar ook op die gebied van baie ander tegnologiese terreine. Die boodskap is: Staal jou daarvoor en wees dankbaar daarvoor. En hou by met jou fotografie kennis.



10111100011101001101010101111100011101001101010101111100011101001101010

10111100011101001101010101111100011101001101010101111100011101001101010001101

01010

Afgelope foto-uitstalling van Towerlantern Fotografie

Ons foto-uitstalling in die Potchefstroomse openbare museum het pas afgeloop en was 'n groot sukses. Ons sê baie dankie aan die personeel van die museum. En in die besonder 'n baie groot dankie aan al die uitstallers – volgende jaar maak ons DV weer so. Ter wille van deelnemers en lesers gee ons 'n paar van die opmerkings wat in die besoekersboek aangeteken is:

- ✓ Meesterlik! Sielsverrykend!
- ✓ Die wêreld in 'n kamer. Pragtig.
- ✓ 'n Wonderlike wêreld vir mense wat met albei oë kyk.
- ✓ Ongelooflik! Inspirerend!
- ✓ We loved seeing the world through your eyes.
- ✓ Kan nie ophou kyk na almal se foto's nie; dis pragtig.

En dan hierdie wonderlike anonieme juweeltjie:

- ✓ Ons ma se foto's is die mooiste, maar al die werke is fantasties!

As jy hierdie jaar uitgestal het, begin nou reeds om 'n versameling op te bou vir volgende jaar.

EN

As jy nie hierdie jaar uitgestal het nie, begin nou reeds om 'n versameling op te bou vir volgende jaar.

Op
internet gesien:
snaakse idees

Is jy
sommer net lus
vir allerlei prettige
foto's? Kyk dan by
[https://youtu.be/
xuDJYWmLFRc](https://youtu.be/xuDJYWmLFRc) vir baie idees,
soos die een hier regs.



Towerlantern Fotografie
- oktober 2019 -

WAARDERING VAN LESERS

Ons haal met groot danbaarheid 'n gedeelte aan uit 'n brief van ons fotografievriend Frans van Heerden wat in Koeweit woon en by Kuwait Petroleum Corporation and Subsidiaries werk:

“Ek wil net kortliks skryf en jou opnuut gelukwens en bedank met jou maandelikse uitgawe van Towerlantern wat ek elektronies ontvang. Dis 'n lekkerlees publikasie en dit is werklik iets waarop jy baie, baie trots kan wees. Dit lewer verseker 'n bydræ tot die uitbou van die kunsvorm.

“Die publikasie is 'n leeservaring van sy eie en dis heerlik en baie aangenaam om dit maandeliks te ontvang. Telkens wanneer ek dit gelees het beleef ek 'n ongekende onrustigheid in my. Dan weet ek baie goed dat dit weer tyd geword het dat ek agter my kamera moet gaan wegkruip en soek na iets wat ek in beeld wil onthou.

“Dis regtig 'n inspirerende publikasie wat met groot aandag en oorweging saamgestel word. Ek hoop uit my hart dat die inisiatief sommer nog lank vol lewe sal bly. By al die mooi en die goed van die publikasie, doen jy ook wonderlike werk om ons Afrikaanse taal te bevorder. Baie dankie vir jou bydræ.”

Hiermee ons dank aan Frans.



Hier is 'n oulike wenk vir wanneer jy met jou kamera of selfoon rondloop op soek na foto's: Neem klein itempies af en stel dit as 'n collage saam in 'n enkele foto.

Dit is presies wat Dorette Cilliers in 'n tuin gedoen het; met dank aan haar. Doen dit na en stuur vir ons jou foto's. As jy wonder, Dorette het dit gedoen met die selfoon-toëpassing PicsArt.

Om te verkoop of nie

Frans van Heerden

Op die internetruimte *Pexels* (<https://www.pexels.com/>) kan fotografe hul foto's oplaai en enige gebruiker kan die foto's dan aflaai en gebruik sonder om hoëgenaamd daarvoor te betaal. Ek het ongeveer twee jaar gelede daar begin oplaai. Ek geniet dit om te sien hoe my kykersgetalle daagliks toeneem, en om te sien hoeveel derduisende gebruikers my foto's vir een of ander rede, aflaai en benut.

As daar ooit 'n geleentheid was van "werp jou brood op die water" dan is dit, wat my aanbetref, juis hier. Een van die mense wat een van my foto's afgelaai het, het 'n vrywillige donasie van \$5 gemaak. My foto verskyn as beeldmateriaal op sy Gospel CD. Ek was regtig verheug om dit te kon verneem en te kon weet ek maak daar 'n bydræ.

"To sell or not to sell" is 'n moeilike kwessie en besluit. Ek dink dit sal 'n interessante debat afgee want na alles, hoekom neem ek foto's as ek dit op 'n bergplek slegs vir my eie genot wil hou?

Van die redaksie af

Van die redaksie se kant af stel ons hierdie saak oop vir bespreking: Moet ek as fotograaf my fotografiekuns weggee en toelaat dat wie ookal, dit gebruik en selfs wangebruik? Of, moet ek my fotografie bloot net op 'n toestel berg, wat ek alleen van tyd tot tyd kan geniet?

Die redaksie verneem graag opmerkings oor hierdie saak.

NUUS VAN TOWERLANTERN FOTOGRAFIE

Eerstevlakkursus: Ons volgende en laaste kursus van 2019 word beplan om te strek van 16 Oktober tot 14 November 2019. Kennisgewings is reeds uitgestuur. Jy hoef werklik niks van fotografie of van jou kamera te weet om hiervoor in te skryf nie. Al wat nodig is, is 'n SLR-kamera.

Aanlynkursusse: Beide die eerstevlak- en gevorderdevlakkursus is ook aanlyn beskikbaar. Die voordele van dié kursus- se is dat jy (binne perke) dit op jou eie tyd kan doen. Omdat dit aanlyn is, kan jy dit doen waar jy ook al in die wêreld bly – solank jy net Afrikaans ken. En dan is dit ook 'n goeie geskenk vir 'n geliefde; onthou Kersfees is nie meer te ver nie!

Spesialiskursus: Ons het hierdie jaar ook met 'n derdevlakkursus begin en ons beplan om dit DV volgende jaar voort te sit. Gedurende hierdie jaar het ons tot dusver reeds besondere aandag gegee aan landskap- en makrofotografie. Tans is ons besig met impressionistiese

fotografie. Ons sal ongeveer by die- selfde genres volgende jaar bly. As jy reeds teen die einde van 2019 die gevorderdevlakkursus gedoen het, kan jy met dié kursus verder gaan. Oorweeg dit solank vir 2020.

Selfoonkursus: Hoewel Towerlantern se eerste fokus op die onderrig van die ge- bruik van SLR-kameras val, sien ons ook watter groot rol selfoonkameras deesdae speel. Daarom het ons gedurende die afgelope maande reeds twee selfoonkamera-kursusse aangebied. Ons sal DV in die toekomst, en juis in 2020, nog meer aandag aan dié saak wil gee. Elke leser beseft seker ook dat 'n selfoonkamera nie net meer gebruik word vir die neem van foto's nie, maar dat dit ook in 'n sekere mate die rol begin vervul as kopieer- en skandeermasjien. Hou jou e-posse dop en laat weet ons as jy (dalk saam met 'n groep) so 'n kursus sal wil bywoon.

Moorivier Kersmark: Die Gereformeerde Kerk Potchefstroom-Oos hou jaarliks hul Moorivier Kersmark teen die einde van November, begin Desember. 'n Groot verskeidenheid artikels word te koop aangebied. As jy dus begin dink aan Kersgeskenke, hou dit in gedagte. Towerlantern Fotografie sal self ook 'n stalletjie beman. Vir ons gaan dit nie in die eerste plek om ware te verkoop nie, maar om Towerlantern se naam wyer bekend te stel. Verdere inligting sal in ons volgende uitgawe gegee word.



Towerlantern Fotografie
- oktober 2019 -